

平

播

全

書

平播全書卷九

明長垣李化

牌票

責令

安疆臣
奢世績

乘虛擣巢

爲軍務事十一月十九日據塘報官朱自強報稱近有哨探人於本月初十日在於綦江簡水鎮抄得楊酋一牌內稱本司因讎奴誣害捏聳妄奏至設防守挑躑速禍本司豈肯甘心的於本月十九日點選十三種苗兵出外清理疆土各立界限仰丁山小溪松坎等里提調坐寨周承榮等將各里頭目苗兵聽候調用牌至松坎驛繳等情轉報

到本部院據此看得播賊楊應龍自知罪大惡極難逃齎粉乃見我官兵到處雲集滅在旦夕遂爾張皇無措西突東奔但狡賊奸謀最詭變幻莫測抑或出其不意傾巢狂逞皆未可知倘衝犯是真亟應設策乘虛攻搆爲此牌仰本官照牌事理速將所部兵馬上緊整擗令各多備乾糧一面多差伶俐人役遠入偵探如播賊委果出犯川中內地本官母官媳卽親統大兵乘虛截斷歸路直搆巢穴有功之日定照先行牌諭緣由賞格事宜從厚優異特與奏請寵錫隆恩獲功目把一體陞賞斷不爽約毋得觀望依違致失機會具遵行緣由飛報查考

建房張二將祠宇

爲播賊突衝孤城將官血戰陣歿乞賜照例贈廕以慰忠魂以勵羣心事近該本部院會同巡按四川監察御史崔看得原任參將房嘉寵原任遊擊今充戍領兵張良賢忠堪貫日氣可成虹提一旅以捍危城率孤軍而當大敵斬將擐旗一代之英風不泯成仁取義千年之俠骨猶香宜有特褒用酬奇節議將房嘉寵照原官加贈三級張良賢復原官量贈二級各廕一子本衛百戶世襲仍於綦江地方立祠有司春秋致祭等因業已會題去後爲照二將生前奮志鷹揚死後舍身馬革每一思及深用惻然所據建

祠一節若待明旨至日方行何以預妥忠魂而激慰羣心也相應亟行豎立用昭祀典爲此牌仰巡上東道官吏照牌事理即便選委能幹職官一員帶領匠作人等親詣江縣會同該縣掌印官就於城中相度地形速將題建二將祠宇一所應用木石等料及匠作工食等項一面估計冊報一面動支官銀分投置辦鳩工修理務要形勢寬闊不許卑狹苟且完日繪塑二像如法安置撥人看守春秋以時致祭扁題表忠祠三字以示觀瞻至於二將屍骸在張良賢或難著落若房嘉寵者必須多方根尋務在得獲就於城外擇其風水完聚去處壘墳一所用棺裝盛以禮

安葬立一碑記用垂不朽庶祀典昭而幽魂慰矣通候完日具由報查俱毋違錯未便

行令各將官置私記腰釘

爲軍務事照得東南征播裨將等官奉委領兵行事軍中緩急機宜勢必具文傳報但各官原無印信每每申呈俱係白紙真僞之間殊無可辯應令製造釘封庶可杜其假詐爲此牌仰四川布政司官吏備行東南二道及在省領兵副總參遊等官一體遵照今後申呈軍機事務公文俱用腰釘上蓋某職某人腰釘封記數字其文用篆刻硃印不用真寫免滋奸弊通候播事完日照舊俱毋違錯

製買船隻

爲緊急軍務事照得濱江一帶州縣運餉運器及渡送官兵等項俱用船隻但有司額設無幾勢必奪取商船船戶因而狐假河泊不安相應酌議置造庶得官民兩便爲此牌仰督餉道官吏卽行濱江州縣等衙門各掌印官動支官銀收買河船或另製造每州縣約買若干酌量大小定與數目或全買見成或半買半造無拘大小俱用新板堅固棚墊全備堪盛重載每船召募水手一名或二名常川在船聽候裝送糧餉或渡送官兵或運軍火器具一應物料等項不許別占有誤傳送此該縣掌印官如法奉行

期完報倘有因循違誤聽該道揭報以憑重究先將應支官銀買造船隻各數目具由詳報施行仍一面料理毋得違誤未便

給播州生員王達諭夷獻關

爲督撫地方事照得播賊楊應龍兇殘成性暴戾非常殺戮五司官民貽患三省邊境惡貫已盈神人共憤卽目聲罪致討用安漢土軍民頃據該土司生員王達呈稱願招夷目獻關開路及稱湄潭三里八牌夷目人民原屬伊父王其質管理提調父子願往招諭待後投見將官乞將伊等家小委官執令保固仍令本處夷兵同爲前鋒乞賞明

文遵照前去等情據此爲照本生心存噬賊志在摠忠所據稱要招諭夷民力圖擒剿相應先責以觀後效爲此牌仰本生卽同伊父王其質前去湄潭等處開諭夷目安阿留潘顯邦任老三傅舟羅廣武李祥道任朝茂任祥等曉以禍福兩途先取各目投順甘結回報若各目人等果出眞誠歸順俟大兵壓境令伊等投覓將官獻二渡關之後定先委官將各目人等家小保固不許一兵擾害仍令盡將三里八牌夷兵數千或爲鄉導或作先鋒俱在本生父子悉心籌畫諄切曉諭各夷毋懷二心自取誅戮本生同眾行事務在縝密毋得洩機有功之日照兵部及本部院

題請陞賞恩例仍破格從優具奏施行如有違誤或摸稜
僨事三尺具在決不輕貸

行辰沅兵備道召五司官兵

爲軍務事照得播賊楊應龍背國厚恩猖亂造反劫殺五
司荼毒七姓神人共憤王法不原卽今徵調天下漢土官
兵夾攻征討滅在旦夕訪得餘慶黃平草塘白泥重安五
司官民雖遭殺戮遺種尙多或寄命偏橋辰沅等處及潛
住黃平等司者不知其幾常懷報恨之心咸有滅賊之志
合行召集用爲鄉導以備前鋒爲此牌仰該道官吏照牌
事理卽便分投差人前去偏鎮辰沅及黃平等處傳諭餘

慶等五司官民七姓苗夷人等如有奮志雪讎願同官兵報效者報名在官逐一點選精銳驍健一可當十者三千名責令隨帶原有衣甲器械具由差人管押徑赴偏橋聽湖廣監軍總兵分布進勦有功之日定照兵部并本部院題准事例授官加賞決不食言其應支糧餉聽該道照例支給毋得違誤未便

寶劍諭言

爲軍務事准兵部咨開播賊狂獗聲罪致討題請欽賜督臣尙方寶劍以重事權奉聖旨賜劍准給發不用命的許先斬後奏欽此差官齎捧到本部院接領通行欽遵外爲

照尙方寶劍專爲征討逆賊頒賜軍中蓋欲整飭人心肅
將天討今照三省兵將已集約會進攻在邇合行示諭俾
知遵守爲此示仰三省軍前文武將吏并漢土官兵一體
遵照各要矢滅此朝食之心嚴逗遛退縮之戒上申國威
下雪民怨如有觀望不前臨敵避難及應夾攻而不夾攻
應應援而不應援者軍令具在王法無親本部院惟知欽遵
行事斷不輕宥各宜慎之毋貽後悔特示

招降播地叛苗

爲督撫地方事照得播賊楊應龍兇殘成性暴戾非常殺
戮五司官民貽患三省邊境惡貫已盈神人共憤卽目聲

罪致討用安漢土軍民頃據偏橋衛儒學生員李佩條陳
擒剿事宜頗有可採爲照本生旣優文學又熟韜鈴心存
噬賊志在據忠所據稱要招降叛苗力圖擒剿相應先責
以觀後效爲此牌仰本生協同把總劉應辰應襲湯大密
往白泥司將叛惡楊七楊鎮邊楊通太楊勝等又同李敖
梁廷祿將夷目趙仕登張祐羅廷倫莫老明秦萬拱秦公
壽蒲欒等又同本衛軍餘謝麟父子黎廷恩父子叔姪將
總管何漢良李彪及提調張云敖楊奇杜勝祖張漢五夷
頭任老三等或用間以離其心或用計以伐其謀或就便
擒斬或隨宜撫諭但須誠心鄉導俱本生同劉應辰李敖

等力擔相機而行又本生所呈平越一路應用軍人閭遐
田維棟入乾平飛練曉諭夷頭謝朝俸等又用生員唐榮
字撫諭瓮水提調郭鳳夷目王志龍等俱聽本生約同唐
榮宇等各悉心籌畫力將各夷開諭利害招撫來降毋阻
道路免取誅夷本生同眾行事務在縝密毋得洩機有功
之日照兵部及本部院題允陞賞恩例仍破格從優具奏
施行如有違誤或摸稜僨事三尺具在決不輕貸

申飭三省道鎮嚴加防備

爲軍務事照得居重所以馭輕有備乃可無患播賊楊應
龍向來狂逞未已今則斂兵不犯誅其賊心自知罪惡深

重天討難逃故爾陽爲自衛其實陰有別圖卽今操弄戈
矛蓄銳已久萬一出其不意突肆流劫或焚燒糧草或侵
攻城池此先發制人之術困獸之鬪槩可見矣誠恐將領
等官以賊久不動晏然忘備卒墮其計誤事匪小合再申
飭戒嚴爲此牌仰該道官吏限文到卽刻轉行所屬鄰播

府衛州縣及領兵將領等官各一體遵照各照所轄井分
定信地凡城池堡隘去處必須加謹隄備以過攻圍糧草
器械等項務要著實備禦以防焚劫仍多方偵探熟思預
圖賊至則合兵夾攻以取勝賊去則斂兵固守以待時一
面多積糧草一面訓練士卒候本部院約定師期刻日行

勦施行如或漫不經心泄泄無備致誤軍機者敕劔具在
應叅者據法叅究應斬者卽時斬首各宜加慎如違自取
罪戾具遵行過緣由報查

獎慰永甯官兵

爲軍務事照得播賊楊應龍兇殘三省流毒鄰封該永甯
宣撫司官目統兵五路奮勇截殺獲苗級六顆申報到本
部院隨行巡下南道動銀二百五十兩給各兵以作牛酒
之犒頃據差官熊應山申解功級前來又行布政司支銀
六十兩徑給本官領回給散各兵以作六功之賞去後爲
照土官奢世續身雖女質繼夫志以馳驅有承家之節義

長官王堯王甫松頭目劉國用劉國恩周愛等職掌兵權
奉主命以勤勞有許國之忠貞以故上下同心士卒用命
戰則勝攻則取芳聲獨邁雄槩可嘉除紀錄候敘外合行
表揚以示勇進爲此牌仰本官限文到卽刻督同王堯劉
國用等將該司勇敢士兵盡數調取相度地利多方分布
差人偵探如機會可乘則直擣猿猱之穴用擒豺虎之雄
此該司第一上功事或稍礙則斂兵固守持重待動有功
之日除本官加給服色建坊旌表外各頭目或願漢官或
願土官定照兵部并本部院題准事例襲以隆恩仍重加
懸賞斷不食言慎勿觀望逗遛坐失事機未便該司仍一

面整點內兵二萬候大舉調進毋得違誤慎之慎之

申飭川東道鎮防備

爲軍務事本年十一月二十八日據監軍道并

總兵劉挺
本官

各塘報探得播賊分付目把不要離心待夷兵養就銳氣
一同衝出徑到重慶又稱賊見南川有官兵要暗發兵三
四萬到彼又連路發有絲絮槍弩等件送在營中及分付
官壩頭目暗地探聽南川官兵劄有幾營且不要與鬪待
看何如略將些兵哄他起禍然後纔動手叫新官出眞州
千歲出官壩約齊攻南川方往別處各等情轉報到部院
看得逆賊向無動靜蓄銳可知戒諭目把擬犯重慶雖未

可信至於探我南川官兵先挑後戰此狡賊奸謀不可不嚴加設防者合行申飭爲此牌仰該道鎮官吏文到卽刻轉行防守南川將領漢土官兵各將分定信地加謹隄備多方偵探賊至則併力截殺以示敵賊去則斂兵固守以待時旣勿聽其挑戰以輕出更勿中其詐敗以窮追一意慎重共保萬全此後但有警息不時飛報俱毋違誤未便

議酌二將事權

爲調選精銳分任責成以便進剿事據鎮守四川總兵官劉綎呈稱播酋楊應龍逆命犯順自知天討難容招集苗兵修圍設險以抗王師公然傳檄欲出奇找尋一對頭似

茲桀驁誠爲一大敵矣况職與酋會同大征職之戰陣酋素知之今旣發牌點兵出犯必自統敵以向職職之戰與守尤宜加備始克有濟惟是標下官兵僅止五千二百五十九員名與中軍周以德并千總易朝臣等下兵共近七八千爲數甚少難克制勝合無容職於前兩次征倭併原隨征克緬虜等得勝舊役兵內揀選精勇者連前共足三萬之數自備軍器病加選練候本部院閱視派定一路或兩路任憑指揮親統進剿成功之日自有公論倘不成功甘當認罪如兵選不精器械不利不以實心報國不惟明有令典抑且幽有鬼神尤當殛之等因據此案照先該本

部院看得該鎮原爲勦播而來祇因在途耽延致臺省多
議遂有調南之命咎由自取人所共知本官聞報卽請交
代本部院以該鎮謀勇素著且係酋所憚故議勉留共圖
大事業已檄行遵照去後今據前因爲照逆賊猖亂奉天
征討凡有血氣者莫不攘臂爭先願效一戰况大將乎總
兵劉綎始而報代咸有怯懦之謠繼雖挽留尙多疑似之
論乃該鎮不動聲色卓然任重教練兵馬整擗器械感激
思奮比前更倍於是乎眾心大定而羣議不生矣茲者見
賊誇張恐防出犯欲選精兵分路進剿此其一念量敵之
志滅賊之心承家之孝許國之忠槩有可見但新任總兵

吳廣不久將到若一履任例應交代所據一應兵權進攻

道路合行議定庶便責成爲此牌仰該道卽會

巡上東道
監軍

道

公同劉帥逐一酌議要見該鎮一應事權作何統攝標下
兵馬作何分管舊將分進何路應否獨當一面新將分進
何路應否總制諸營軍中貴和何以同心可免忌妒之害
決勝在合何以併力共收掃蕩之功務俾上不誤國下不
殃民一一面訂明悉具由通詳以憑定奪施行至於劉帥
果能協同將士矢忠宣力運籌決策奮勇直前大收全捷
者是渠先人昔已邁迹於九絲而本官今又流芳於播土
其功豈淺淺耶本將應自有成算無俟他人叮囑爲也

行東西四道查議運餉人夫

爲患切剝膚敬陳一得以圖萬全事先據督餉道議得征播轉運軍前餉米一十四萬有零以通省丁糧一百一十九萬有零計該派夫十萬每名負米三斗日行三十里限以三箇月轉運營中已允行該道議派去後未報今該本部院復看得運夫隹之丁糧編派無非均平賦役重擎易舉意耳但夫止十萬派之通省不無騷動及照川西川北上川南下川東四道地方距播甚遠上東下南二道距播甚近前項運夫若於二道出夫轉運事旣省便又可責成西北上南下東四道徵銀解募旣免動眾民多樂從合再

酌議爲此除會按院外牌仰該道官吏即便會同

督上南
巡下南

道查議餉米一十四萬若用運夫十萬每名每日給銀三分大約以三箇月計算人各該銀二兩七錢以通省丁糧一百一十九萬有零將西北上南下東四道所屬州縣免行派夫每糧一石徵銀若干在官解作募夫工食以上東下南二道免行徵銀重慶所屬派夫六萬敘瀘所屬派夫四萬專令轉運銀限年終徵解重瀘收貯聽支夫限次年正月中旬差人管押馳至二處聽督餉道該道分派轉運中間若有編派不足在川東則於綦南等處在川南則於高珙陸縣或又於揀下募兵之內多方召集倘再不敷或於他

道鄰近州縣酌量派足悉聽便宜從事其合用行糧布袋等件查照前牌施行此事關係頗重務要留心計妥毋貽後議方爲完策俱毋違錯未便

行三省申飭詐僞

爲請查差官眞僞以肅軍令事本月初一日據湖廣分巡湖北道呈十一月初四日據總督經略軍門標下把總何世卿親執手本赴道稟稱奉提督劉差押小鹽二萬二千有奇前去偏鎮土司犒賞苗兵載至彼處不敢擅便乞批執照過關等情當該本道而審奉委根因又據執出紙印花欄令牌一張內云總兵官劉牌仰把總何世卿等領銀

二千四百兩發買小鹽前至鎮遠施秉給散苗兵云云九月十二日提督府押年月用關防鈐蓋本官續又吐稱奉總督軍門發銀給劉總兵差伊買鹽賞苗本道驗視牌內字迹差訛詰問應對矛盾恐係詐冒除將載鹽船隻封委巡捕員役看守及將何世卿拘留羈候外伏乞查閱卷案會否轉委劉總兵令買前鹽若無本官名目卽係詐偽請頒憲令容本道盡法究擬另詳等因到本部院批本部院並未發銀劉總兵處買鹽賞苗此係播賊因鹽禁太嚴無從市買故爲僞牌盜買者一旦盤獲令人快然仰將原鹽盡數沒官何世卿嚴行究招詳報去後爲照播地所缺者

鹽也無鹽則無命其來遠矣故本部院屢禁不許鹽布與硝黃入播者一欲絕其養命之源一欲杜其交結之奸耳乃逆酋因見禁例嚴密無從市買僞造假印假牌令黨惡何世卿詐冒官差公然執持出境直至楚中盜買私鹽二萬二千有奇覓船裝載經過常德而世卿欲越關津遂具手本徑赴分巡湖北道投見希圖驗放若非該道注意詰出幾爲欺誑第逆賊既能僞造總兵關防令牌標判畫押又指軍門轉行差遣可謂極惡神奸真無所顧忌者誠恐僞造關防假牌假差不止總兵與本部院兩處而諸衙門印記等項或亦難免則凡差遣牌票往來文移皆不可不

慎至於所買者恐不止於私鹽一事布匹硝黃等項良必有之合就通行申飭用肅軍令爲此牌仰該

道鎮

官吏即便

通行所屬府衛州縣并巡司等衙門及各隘領兵將領等官一體遵照除尋常事情外凡事干偵探軍機或在境內或在境外差人收買應禁軍器或鹽布硝黃等項者或係公移或係牌票俱要詰問明白辯驗無僞方准驗放如有文移失體語言矛盾及稱買賞土司苗兵等弊如何世卿者卽係詐僞就便擒拏解究有功員役分別獎賞如或因循怠忽不行盤詰及縱容爲奸者事發自干重典決不輕

恕

發兵綦江

爲緊急軍務事照得綦江自殘破之後欲守無兵况戰乎故從羣議不設隄防賊遂斂手不敢狂逞此緩兵之計得矣今照三軍畢集九伐在邇所據該縣城池亟應豫圖先用文武材官統領重兵鎮守其地庶幾兵糧漸積可以舉事爲此牌仰巡上東道官吏劉總兵熟加酌議防禦兵馬應用幾何某處某枝共該若干應委何官何將統領先去備禦某處某枝尙有若干應以何官何將管束聽候調遣兵馬到彼務要多方安劄糧草運彼必須設法安屯城垣關隘坍塌者上緊繕修公署倉廩損壞者火速葺理合用錢糧一

面動支興工一面具由通詳慎勿膠柱致誤事機至於賊如不來城內城外作何分布賊或入犯在此在彼作何應援務須長慮卻顧共保萬全稍俟糧草運有次第約期大舉施行此係最急速議報毋容遲緩未便

再申飭三省邊防

爲佳節屆臨再飭邊防以戒不虞事照得播賊犯順警報不常本部院切慮攻心又慮攻城其隄防之約申飭之令已不啻再三再四矣目今歲杪元旦屆臨固人間至慶之會然兩軍對壘之際非將士燕樂之時也萬一酣飲而不知酩酊而不覺賊反伺隙入寇昏夜之間人不及甲馬不

及鞍安能與之相角其不取敗者幾希合再嚴加申飭爲此牌仰該

道

官吏限文到卽刻移文各路領兵將領等官

各一體遵照凡目下舊歲之杪新正之旦此等月日最宜
謹慎一切防備之策比常務須加嚴萬倍熟思顧慮少爲
夜飲常懷敵愾之心共效徙薪之計凡城池堡隘去處則
晝夜隄備以遏攻圍糧草器械等項則時刻守禦以防焚
劫賊如不動則斂兵固守以養銳賊若入犯則併力合攻
以張威務期各保信地共收萬全候本部院酌定師期不
日大舉施行至於營中火燭與火礮之類俱要謹慎以防
疏虞敢有不遵禁諭或長飲不知偵探晏安忘其設備致

誤軍機者敕劍具在決不敢私各宜慎之勿自速戾通具
遵行緣由報查

督勵安疆臣擣巢

爲飛報萬分緊急地方事本月初六日據貴州布政司呈
據防禦黃平指揮徐登階稟稱十一月十九日未時探兵
李孝夷頭阿保等各報稱播兵數萬由白泥出小大章劄
營又由構皮灘過渡出苦菜坪到白泥劄下又報播苗在
興隆擡頭坡劄三大營八小營今又發探馬來黃平長沖
哨探有大翁鋪軍民驚慌搬移等語查得各報兵情如出
一口且黃平在播巢之中防兵五千眾寡不及事勢燃眉

伏乞速令安疆臣遣兵由沙溪入播襲後庶興隆黃平之急少緩同日又據按察司呈據興隆衛東坡堡軍人李萬等飛報播兵數萬徑出後洞圍殺白田乾溪水口黃眼等屯燒擄人口房屋卽今糾合容山九股等處叛苗攻打興偏黃平東坡爛橋又執木刻上寫把總隆論興隆通衛官民吾今督兵數萬追尋奸徒馮權張熹何以爵等爾等早爲發出以免刀兵執迷不發玉石不分等語卽今屯兵離城五里上阻重安下拆偏橋中攻興黃徑通九股以爲大逆請將發兵救援又據監軍道張參議呈報相同各等因到部據此看得播賊楊應龍不知滅在旦夕尙且聲兵四

出爲計愈狡積罪愈深及照水西宣慰司兵精將勇甲播萬倍本部屢有秘計令爾宣慰安疆臣母子與目把人等就中取事向未見動未審因何觀望若此卽今兵出黃平內必空虛若能率兵數萬暗由沙溪直衝腹心以襲其後賊必首尾不救勢必成擒犁庭掃穴功收此舉合再督勵爲此牌仰宣慰安疆臣照牌事理限文到卽刻點兵數萬親自統領督同目把直由沙溪徑進或擣其巢或襲其後務入豺虎之穴盡掃犬羊之羣解黃平之衛建拓土之業功莫大焉定照兵部及本部題准事例從實具奏將母子褒嘉隆恩割撥播地世守目把人等授以指揮實職仍重

加懸賞決不食言如或逗遛不進致誤軍機者不知該司作何收拾也慎之慎之速速毋忽

行湖廣布政司催兵糧

爲軍務事案查節行湖省布政司調集彼中漢土官兵四五萬分布鄰播關隘一面買備半年糧餉隨運適中地方并委官打造軍器火器又經節次行催去後未見報到兵糧如何徵調器具如何修製卽今川貴調到漢土官兵俱已畢集糧餉器具諸事皆齊本部院卽目建牙重慶興師計在目前只慮楚中整備未足難免牽制况蜀兵今已十萬之上日費太折不貲早進一日得省錢糧若干事勢燃

眉雅再稽緩且聖懷西顧甚殷萬一以該省兵糧遲誤震怒則將誰諉合行再催爲此牌仰該司官吏即便查照先今事理轉行各該道將兵糧二事并軍火器具作速備辦同報以憑施行毋再遲延未便

約束客兵

爲軍務事照得陝西三鎮并河南等省官兵業已畢集淪城人馬眾多爭端易啓惟是禁令森嚴庶可杜其後患爲此牌仰該道官吏即便會同總兵劉綎督行各該領兵將官各將所部軍兵嚴加約束凡買食買物俱要兩平交易無事在營操練熟習弓馬槍刀有警卽赴截殺務要奮勇

先登倘有不守紀律在於街市生事或騙人酒食或強取米菜之類卽押赴令前按法細打如情罪深重仍斬首施行該管將官失於鈐束一體連坐不貸

委總兵劉綎防守綦江

爲緊急軍務事據兵巡上川東道呈稱綦江雖已殘破然城郭民居尙堪整頓爲我老營以備屯糧之資萬一狡謀復逞化爲煨燼則我數萬士馬難免野棲數萬芻糧豈能露積請乞先發精兵一枝令驍將一員統領前去防護等因到部院案照先該本部院看得該縣殘破之後應用文武材官統領重兵鎮守已經牌行該道并監軍及劉總兵

會議去後未報今據前因爲照綦江係我屬邑殘黎係我編氓發兵捍禦勢不容已第恐逆賊聞知拌命衝突實未可知必須大將坐鎮其中庶得角力及照總兵官劉綎素負勇略爲賊所憚者相應行委前去彈壓則先聲所至賊膽頓寒爲此牌仰本官一面先行料理俟本部院至渝面議軍機之後卽便帶領部兵并漢土精兵三萬名前往該縣坐鎮賊來則併力截殺賊去則設伏勦擒勿俾跳梁稍俟糧草運有次第約期大舉施行

調施南兵入黔

爲軍務事照得播賊猖亂動兵征剿查得貴州思南府龍

泉司係通播大道應用官兵三萬由此夾攻但該府無兵可恃若不酌處萬一乘虛衝出似非完策所有本部院徵調施南土司官兵八千名不日經過黔武地方相應免行入川就近改從該府進播不足之數聽候另行調補爲此牌仰思仁道官吏卽行思南府遵照如施南官兵八千員名到彼諭令暫且住候聽由龍泉道入播分布施行除行糧已經川省解給外其坐糧每日該銀二分四釐本折兼支俱要多方備預萬兵半年之費如有不敷速詳該省兩院借處接濟此係軍機重情如或違誤責有所歸并查該府及夔川防守官兵見有若干一併具由回報一面多處

糧料以憑另行調發馬步官兵仍呈撫院知會毋得違誤
查催糧料烘炒等項

爲緊急軍務事照得征播官兵業已分布進攻所據隨營
餉米烘炒米藎鹽馬匹豆料等項皆時下急需先經節次
督催并取各州縣已未完數目造冊齎查去後未據冊報
誠恐遲誤合再嚴催爲此牌仰布政司督餉道官吏查照單開先

今各起詳允買運及改徵本色餉米各項數目要見某衙
門原買某項軍需若干已完運貯某處若干有無實收可
憑未完若干因何不行起解又秋糧改徵本色并各倉稻
穀碾運原定各若干見徵何處未完若干卽今收貯重瀘

一帶濱江屯兵地方某處有米烘炒薑鹽豆料各若干炒米應於某衙門炒備一一清查如有未完卽便分投差人守催起運仍分別完欠備造文冊一本呈報以便徑行查催其烘炒炒米該司具議呈以兵六萬計故僅造烘炒三千炒米六千今官兵旣多一倍應否再備上緊急議分行產麥州縣動支官銀再造烘炒若干一面先行一面詳報不許遲延未便

撫苗告示

總督部院示照得播賊楊應龍始於飛練繼於綦江殺戮官兵荼毒萬姓神人共憤王法不原致塵朝廷奮怒調發

天下兵馬五十餘萬卽日進剿滅在旦夕乃逆賊尙不知死復行劫掠東坡爛橋王斛更欲入犯黃平興隆偏橋誠恐九股苗夷不知順逆誤聽誘哄糾合爲害連累偕亡無可憫合行撫諭爲此示仰偏橋興隆黃平地方九股苗夷知悉播賊楊應龍罪惡深重朝廷必剿旣無可生之路又無招撫之情毋聽誘哄黨護爲非中有真心投降及眾所推服者許同差去撫苗官員引見該道量加獎賞或給以冠帶管束地方其有誤入賊巢各苗又諭令潛行逃出歸依出首者聽其自新並不追問有能報效殺賊者有功之日定照兵部并本部院題准事例加官受賞決不食言

設或執迷不省大兵到日玉石不分悔之晚矣思之慎之
特示

行貴州道府招撫苗夷

爲軍務事爲此除發告示前來曉諭外牌仰該道府官吏卽

便添差機變能官人役同本部院差官指揮曹仁佐前去

九股地方撫拘各苗到官逐一傳諭播賊已犯必誅之條

絕無招撫之路各安生理保守身命毋聽誘哄黨助爲非

中有向化投順及爲諸苗所推服者引見該道府卽加犒賞

仍給以冠帶管束地方其有誤入賊巢願歸者聽其出首

許令自新並不追究有能率眾報效併力殺賊者有功之

日定照兵部并本部院題准事例加官受賞決不食言設
或執迷不省大兵到日玉石不分悔之晚矣其應用賞需
并製造冠帶銀兩卽於該鎮遠府稅課銀內一面酌量動支
一面通詳施行該道仍呈撫院并巡道知會俱毋違錯未
便

行二省各道驅逐播賊

爲緊急軍務事照得播賊楊應龍頃糾各苗攻破東坡爛
橋王嶺殺擄鎮遠許花等處屯堡仍令惡目何漢良率兵
屯剗偏橋興隆接收九股生苗裏應外合結聚不散及照
偏橋迤東迤西乃黔省交衝之地唇齒相連之所節行二

省道鎮等官發兵分布慎防突出已不啻再三再四矣今
寇入門庭患在肘腋未審兩地文武各官作何防禦作何
驅逐擬合嚴查爲此牌仰該

道鎮

官吏照牌事理卽會同總

兵童元鎮備查賊兵前攻東坡等處黔省官兵會否救應
今屯偏橋等處二省官兵會否交鋒今旣劄營不散或合
兵夾攻或設法驅逐與夫九股生苗依附賊黨裏應外合
或多方離散或用計鵬勦俱要同心僇力拯溺救焚以靖
地方各體奉公之心毋懷秦越之視限文到三日務將各
苗驅散驛路通達如或彼此觀望逗遛不前萬一失誤軍
機以致債事本部院定行據法叅究決不輕縱各具賊兵

解散及有無失事緣由報查仍移文

左監軍道上荆南都清兵巡道守湖北督餉

道一體知會施行俱毋違誤未便

再催湖北督餉

爲緊急軍務事據分守湖北督餉道呈稱奉文催督兵餉已經買完米一萬四千八百九十石零倉穀碾米一萬五千五十石零陸續起運近又再碾倉儲得米一萬石又動銀買米五千餘石接運前去等因到部院爲照該省信地應用官兵四萬有奇每名每日支米一升一月該米一萬二千一年該米一十四萬有奇今該省前後具報止有米四萬五千不敷五月之食萬一師期難定數萬兵馬枵腹

干係誠爲不小合再催買爲此牌仰湖北督餉道官吏查照節行將四萬官兵一年之餉除已買及倉儲碾運聽該道催運偏鎮一帶收貯聽支外尙少之數或動道屬庫銀糴買或再碾倉穀起運多方設法星火措辦至於乾糧烘炒炒米薑鹽等項俱要運赴彼中聽候支給此時川貴卽目舉事不比往昔尙可稍待况播賊已破東坡爛橋劫虜鎮遠偏橋一帶屯堡俱係楚中信地卽今各苗驅之不去見在彼中屯營阻塞三省官道此是何等景象當事文武豈可泄然怠緩自貽伊戚也該道專司餉務責有攸關脫有違誤均屬未便速將續買餉米的確數目具報查考毋

違未便

行六監軍招降

爲廣招降准免死以全億萬生命事照得逆賊楊應龍殘害播民興兵造反朝廷發天下兵馬征勦原只誅他父子二人脅從罔治顧播州之人雖曾與賊謀事領兵原是在他手下屈於勢力要非得已本部院仰體朝廷好生德意並不追論况殺降者不祥誰肯樂此卽今進兵在邇恐各頭目苗夷人等不知惻隱仁政疑畏不出投見萬一大兵一至玉石不分槩加誅戮有所不忍合行刻發免死小票聽給收照以全眾命爲此牌仰該道官吏卽便密切分投

差人直去播境傳諭應龍手下軍師黃明敬孫時泰等謀士何漢良李旭張玉彭道何廷瑞等總管楊兆麒郭通緒何邦甯等伊親田一鵬田良玉等提調巡警尙守忠趙仕登謝朝俸張漢武羅臣朱敬袁守剛王大安石勝俸等苗頭吳金錢吳金富石朝貴曹萬曹嚴等各里頭目婁國張讓穆炤袁鏊等伊妻田氏弟瑞龍兆龍從龍等管圍內官葉喜受閻懷石等桃溪莊丁五十四里八十八局人戶節招九股苗及紅腳黑腳等苗俱許投降並不加害如有傾心向化願來投順者俱見忠義先給免死小票執照待彼果有真心又將妻子親屬送質至日另給後票收執安插

得所自今伊始盡洗舊惡聽立新功有功之日照格陞賞
決不食言如或詐降及勾引姦細爲害者盡誅不貸

投降執照

欽差總督軍門照得播賊楊應龍興兵造反朝廷發天下
兵馬征勦原只誅他父子二人脅從罔治今某雖曾與賊
謀事領兵原是在他手下屈於勢力實非得已茲旣傾心
向化願出投降足徵忠順應准免死給票執照爲此票仰
本人卽將妻子親屬送質以表真誠盡洗舊惡聽立新功
有功之日照格陞賞決不食言設或詐降及勾引姦細爲
惡者盡誅不貸

質妻子投降執照

欽差總督軍門照得播賊楊應龍興兵造反朝廷發天下兵馬征剿原只誅他父子二人裔從罔治今某雖曾與賊謀事領兵原是在他手下屈於勢力實非不得已茲既傾心向化願出投降足徵忠順又將妻子親屬送質尤見真誠應准免死給票收執自今伊始盡洗舊惡聽立新功有功之日照格陞賞決不食言設或詐降及勾引姦細爲害者盡誅不貸

禁止恐嚇

爲軍務事照得易暴以仁止戈爲武逆賊楊應龍稱兵犯

順自干天誅朝廷命將興師凡以伐暴救民非得已也近訪得渝城內外有等無籍棍徒諭知昔年逆賊久繫城中士民多有與之相識者往往假以通播黨逆名色恣行恐嚇人無甯居殊可痛恨不知逆賊未叛之前播爲王土彼爲王臣何人不可與之往來逆賊既叛以後彼爲亂臣賊子人人得而誅之自勦旨一下其妻子頭目半多去逆效順投狀歸誠况內地良民誰肯以身試法與之相通乎且近奉明旨止誅應龍父子其餘脅從之人但肯投降卽在免死立功此在賊黨且然豈有復以往事波及善良之理令行曉諭爲此示仰遠近居民以後宜大家戮力同心共

圖滅賊永除民害其以前凡與播賊往來事情不必告言
官司亦不必准理若有造言生事惑亂視聽者事發審實
定行梟斬決不輕貸須至告示者

勸銀募運餉夫

爲軍務事照得運糧夫役先據督餉道議將通省丁糧派
夫轉運呈詳前來批行間近該本部院經過簡資內隆一
帶地方據道路之言咸稱派運多難召募爲便應當通變
仍照本部院初議責之上東下南二道募夫轉運但募夫
恐無身家籍貫難以責成就以該道原派里甲夫數爲用
內下南定擬四萬上東定擬七萬三千之上合用工食每

名日給三分一月九錢三箇月該銀二兩七錢卽以全省
丁糧共該派銀二十萬餘兩并議以後督餉道專管水運
至重瀘二處東南守巡道專管催夫運至營中如有夫無
米責在督餉有米無夫責在守巡又經通行遵照去後所
據前銀欲就派行各該有司起徵但事勢急迫且非徵科
之時合先動解以俟處補爲此牌仰布政司官吏卽於庫
貯大木餘銀內動支二十萬兩以十二萬解川東八萬解
川南充作運餉募夫工食俟應徵之時照例起科解補施
行此係立等雇夫事理作速起發毋得遲違未便

禁邊民劫殺降夷

總督部院示逆賊楊應龍兇暴淫虐嗜殺無忌數年以來播州之人如在水火近聞大兵征剿紛紛攜家出降去逆效順便是良民明旨寬仁原許勿治近聞有先年投出播民及播邊一帶棍徒往往指以報讎及塘報名色凡遇播民逃出投生者輒恣行劫掠不行報官以致陷溺之民進退無門上失天地好生之德下負部院招降之意殊可痛恨除已前不究外今後但遇播民出外帶有的親父母妻男子姪或攜有牛馬家財真心投降者塘報人役卽報知所在各該縣掌印官與同將領等官虛心查審別無僞情許卽收留安置得所如有棍徒將出降之人乘機劫掠阻

絕來路審實定行梟斬若中有詐降之人乘機出外探聽
聲息卽係奸細一面收監具報務要查審的確固不可容
奸輕入又不可阻其歸降此在文武各官調停而行毋得
違錯特示

行湖貴總兵應援思石

爲萬分緊急地方事本年正月初一日據貴州兵巡思石
道呈據石阡府呈准龍泉楊都司手本內稱播酋楊應龍
喪心狂逞大肆猖獗已無天日稱言各巡警不破龍泉思
石想是與外司交通已將杜勝祖李旭全家抄殺勒令何
漢良督同巡警統領大兵數萬攻打思石龍婺地方事果

燃眉較與往時警報甚屬不同難容頃刻苟延但本府孤懸僻地將少兵單設若突至實難堵敵請乞速移銅仁并各總鎮帶調精兵星夜前來急救合行飛報等因到部院看得逆賊楊應龍頃者方破東坡爛橋王嶰旋復攻圍偏橋黃平今則又欲入寇思石龍婺且先殺巡警以懲怯懦則激何漢良力攻之計昭然見矣及照貴州總兵童元鎮湖廣總兵陳璘欽奉簡命職在專征若二將同心僇力提兵合剿勢如拉朽且均有地方之責難容坐視合行督屬爲此牌仰本官限文到卽率部下兵馬馳至思石地方督同彼中防守官兵多方分布相機戰守務要大挫賊兵保

全境土上紆朝廷西顧之憂下解軍民水火之厄論功酬報爵賞具存如或逗遛不前致令焚劫村落失陷城池國有常法何敢相貸慎之慎之先具起程日期飛報查考

申嚴南川防守

爲軍務事近據塘報官報稱有綦江縣民李國二李守耀報三十日午時接黃加言書信稱楊朝棟正月初二日出寨子山此行必有事情寨兵不時臨境難以離動今星夜走報乞馬上飛報南川綦江加兵且黃加言口稱初二初三出有的信等情報道本部院看得該賊父子自知滅期計在旦夕方寸潰亂故隨處揚兵如待烹釜魚東衝西突

計無所施據報前情事勢近真合行申嚴爲此牌仰該鎮道

官吏卽將南川地方警報事情嚴責彼處土漢官兵同心

僂力決策運籌分布把截通播隘路前後犄角爲勢不時

差人遠行偵探該鎮一面發令責成酉石

二土司官兵如賊果出相機撲滅倘再報情形夥眾本官

卽馳赴援敵如當捕殺之時官兵逗遛不前卽押赴旗令

下正法施行若將官應敵失策致賊滋蔓爲害賜劍具在

決不姑息先具遵行緣由報查

總兵以下將領各乘馬

爲軍務事照得將領乘馬例也但北方副參遊皆乘馬南

方則皆乘轎此亦積習相沿無足爲異惟進剿播賊在卽將領當身先士卒須演習鞍馬方便征進若此時尙拘舊套日坐肩輿直待進兵方乘馬彼時人馬不相得何以克敵制勝爲此牌仰監軍道官吏卽便轉行各路領兵將領等官一體遵照自今以後各宜乘馬習戰不得復擁肩輿直至賊平事定方復其舊若以乘馬勞不如坐轎逸則當早平逆賊坐享其逸不亦可乎其總兵體統原重轎馬隨便俱毋違錯各具遵行緣由報查

行思

仁守石巡

道查龍泉情形

爲萬分緊急軍務事本月初四日據貴州清軍督糧帶管

分守思仁道郭參政呈稱去年十二月十九日據指揮胡效忠部下逃出紅兵張問仁鄭紹勳報稱十八日播苗四面抄殺將川礮錫落三跳綏陽各哨官郭明選喻時興蕭才一冉文燦同各哨兵盡行擄去候同別兵一齊開刀楊守備胡把總見被圍在鳳凰山不知這半日作何抵殺又據猷木關探兵周萬陽等報稱各關哨把總官兵盡被殺擄逃散惟綏陽把總李冠領殘兵數百至營傳言思南鄉官蕭察院不與代辯決要拋死大做一番至思南過年又據龍泉守備楊惟忠呈報二十二日據土官安民志報稱播苗大書白牌內云綦江黃平二路兵進警急趕集各所

巡警苗兵前去救援見聚三跳水平等處二十三日突
至龍泉土缺河與營哨官兵敵殺數陣見在相持等情除
本道遣防守思南把總王應輔黃儒兵共一千名令守備
徐元爵領赴龍泉救應外合行轉報等因到部案查先據
兵巡思石道路副使報稱播賊令何漢良統兵欲犯思石
龍葵隨該本部馬上檄行湖貴二省總兵陳璘童元鎮各
帶部下兵馬并催原調施南土兵八千名改發思葵兩處
各星馳前來策應續據該道報稱播兵來攻龍泉又經馬
上檄催前項官兵火速前來救應去後今據前因除再催
前項官兵馳赴外看得思仁道所報賊兵已將川礮錫落

三跳綏陽各哨官兵盡行殺擄楊守備胡把總見被圍困
土缺河見在相持則龍泉孤城勢如累卵萬一龍泉有失
思婺必然震驚添兵防禦設法驅逐誠不可時刻少緩者
今寇在門庭而思石道與思南府婺川縣各壤接川境本
部院駐劄重慶急走不過四五日之程乃臘之十八日地
方失事至今二旬之外因何杳無一聞泄泄至此據法卽
當叅究但未審情形是否虛實姑再嚴查爲此牌仰該道
官吏卽將前項所報殺擄及兩軍相拒或勝或負等項情
狀逐一火速查明一面多集兵馬嚴加隄備相機戰守一
面徑申該省撫院上緊添兵分發救援其失事員役查明

另報先將賊情有無解散緣由馬上飛報查考再毋遲誤
未便

酌定運夫行四道

爲酌定運夫以便遵守事據兵巡上川東道議將東路兵
巡下川南議將南路各陸運人夫每道各編派八萬名等
因據此案照先該本部院議將二道轉運餉米一十四萬
石定期三箇月每名日給銀三分於上東下南二道就近
募夫轉運去後今據前因該本部院計算征兵一十二萬
每名日給食米一升一日該米一千二百石十日一萬二
千石一月三萬六千石三箇月該十萬八千石又以每夫

一名每日運米三斗一萬名三千石六萬名一萬八千石
陸運該十萬八千石是六萬之夫循環陸轉米十萬八千
堪足一十二萬之兵三月之食也所據二道征兵各計六
萬則運米之夫每道止用三萬可知及照師期逼近糧糈
當隨比查自重慶瀘州一路由綦江一路由南川一路由合江
一路由永甯俱係水路至彼進營又當相度地里酌量轉
輸矧征兵糧餉既有行坐之分則運夫工食亦當有勞逸
之等合再通行遵照爲此牌仰該道官吏即便會同巡下
南瀘道將重慶收貯餉米照依原行雇募船隻撥給人夫一
面運綦江南川合江永甯伺候至於到彼轉發營中陸運

人夫遵照今定止用三萬派行

重慶府所屬州縣
敘馬廬所屬州縣

上緊召

募齊備內將一萬五千分撥綦江一萬五千分撥南川一
萬五千分撥合江一萬五千分撥永甯各聽候發運不許
違誤多派之數悉行停止以免拘擾仍酌量道路之險夷
以定遣夫之多寡既不可過多以勞民又不可太減以誤
事惟求人力便益糧運獲通其應給工食行則全給坐則
半給庶幾勞逸妥當而征夫不致藉口矣此外糧餉如有
不足聽候臨期遞加不在此限具派募過人夫發運過餉
米數目報查仍移守道知會

行道鎮會議護運交收事宜

爲軍務事照得軍前餉米運夫俱已酌定通行遵照去後

所有護運交收二事尙未講求事關重務合行會議爲此

牌仰該

道

鎮官吏即便會同

監軍守巡各道將川東川南四
總兵官將秦南永合二

路路進兵運餉事宜逐一計議要見轉運餉米行則作何護

送止則作何隄防可免他虞米運到彼部者作何交割復

運受者作何收貯聽支俾得兩便與夫未盡事宜從長計

議妥當具由通詳以憑施行必使人夫無恐糧運獲疏俱

毋違錯

安置降夷

爲軍務事照得播地夷民一則被酋虐害一則畏我並誅

傾心向化襁負而來相應安插用示優恤爲此牌仰

川東
巡上

監軍
東

道官吏即便置造白旗二桿而上書招降二字一樹

於江北遞運所一樹於佛圖關外將已至者逐一安置得
所未至者聽其來降就便安插隨寓宿食一面譏察來
兵在彼巡緝但有來降就便安插隨寓宿食一面譏察來
歷不許容留奸黨投順各民如奉各衙門喚審方許差兵
管押進城審完仍回降所住劄非奉調取擅便入城先將
委官重治降民以軍法細打委官及手下人役不許恐嚇
來降之人如有故違查出一併究罪該道將布置過緣由
呈報毋違

通行水陸二路防賊逃遁

爲警隘路以防逃逸事照得大兵一進勢必瓦解誠恐逆賊一慮官兵擒斬一慮左右內變不肯甘心就戮希冀苟免或統兵假道衝突或變名易服充作經商或削髮披緇詐爲僧道預蓄遁計實未可知訪得播之歧路雖多無如九股爲最一自首地田瓮水草塘出平越衛地方一自湄潭由餘慶黃平重安凱里一自板角關由龍泉司長雀思石地方通偏橋衛施秉縣進容山司俱入九股實係播州咽喉之地加之此中熟苗數萬一用爲鄉導引路而入此地四出漫散卽難窮追合行嚴加把截庶免逃遁爲此牌

仰貴州監軍道官吏卽便轉行各路領兵將領等官一體遵照各將前項九股關隘道路照依分定信地多撥軍兵嚴加把截凡一應往來軍民人等勿拘經商僧道但有面生可疑及異言異服者俱要用心盤詰如有拏獲大奸巨惡或叛賊私逃而能捕獲擒獻者定行照格陞賞決不食言如或坐視怠玩不行盤詰以致叛賊私遁及受財賣放者事發定以賜劔行事斷不輕容各宜慎之毋忽仍移文思仁思石都清新鎮貴甯守巡各道一體遵照具遵行過緣由繳查毋得遲違未便

犒馬千乘

爲優犒首功土官以鼓敵愾事照得石砭宣撫司宣撫馬
千乘守禦邊城紀律嚴肅防逆入寇則枕戈以待時遇賊
衝鋒則驅兵以向敵故擒斬者五十餘級而蹂踏者六七
險若功奪諸司之先首破叛賊之膽忠勤雅負勇猛足稱
且妻秦氏隨營報效功亦可嘉俱應獎犒以鼓敵愾爲此
除部下有功目兵當卽照功支賞外牌仰本官卽將解發
銀花四枝共重三兩二錢銀盃四箇共重一十二兩色段
四匹共重二十兩銀牌二面本官夫妻均分收領以示軍
門優犒首功之意本官承獎之後務要獎率三軍竭忠報
國成功之日自有厚酬慎勿始勤終怠可也

再催貴州布政司兵糧

爲緊急軍務事照得貴州兵糧整備半年之上迄今尙未就緒甚屬掣肘此時川中漢土官兵數計一十五萬之上分布已悉糧餉亦陸續運赴進兵地方惟黔省司道漫不注意本部院節行文移不啻干言差催人役絡繹不絕未審何事坐致稽違卽今該賊見屯多兵東衝西突於龍泉思石等處狂逞不已是明知該省以軍機等兒戲故爾輕視若此今照師期逼近大舉齊進勢同燃眉合再嚴催爲此牌仰該司官吏卽將該省本色糧米并乾糧烘炒炒米魚鹽薑蒜之類要見運完者見解何處何官監收聽支軍

火器具製完者分給其將領收領未完者曾否差人守催
近日會題新募精兵三萬曾否募足見委何將領統督分
布何地屯劄如其中尚有未完備者上緊一日一次差人
前去守催不出此月足備以便齊進此係立待定期事理
先將已齊各數目并近日分路責成緣由飛報如經承所
司間有玩違愆期誤事者指名開來以憑拏解以賜劔行
事決不姑息

發令南川并湖貴各監軍道

爲軍務事照得監軍道奉命監軍征勦播賊凡軍中分布
漢土官兵指授緩急機宜當對壘之際部領士卒應進不

進應援不援與夫臨陣退縮等事俱係軍令攸關特發令
旗庶便行事爲此牌仰該道官吏卽將發到令旗一桿面
收執軍前調度一應事宜敢有平時阻撓兵機不遵驅使
臨陣畏縮退避致損國威及洩漏機密交通逆黨一切壞
法干紀之事應按法處治者指揮千百總以下俱聽便宜
以軍法從事偏裨副將卽據實叅呈以憑究處具遵奉緣
由報查

行總兵劉綎進綦江

爲飛報地方緊急軍情事本年正月十五日卯時據重慶
府同知管綦江縣事周作樂報稱本月十四日午時分據

本縣塘報喻顯旺報稱探得賊兵於十三日未時在地名
大埡雜縣二十五里將一人祭旗就將生員歐爵歐希然
等房屋燒毀十四日又探得播兵二三百馬三隻由插旗
山過三溪小河至羅一黃家擄掠男婦不知其數將訴冤
條款木牌丟水當獲一塊付令狐椎王貴等馳報外卑職
看係地方緊急軍情理合塘報等因到部看得逆賊統兵
已入綦地殺人祭旗燒焚房屋擄掠男女且去城止二十
五里該地防守兵陸續發去不下萬餘略不以一矢相加
遺不知設兵何用恐從此賊遂欺我怯懦長驅入寇若非
大將親臨調度恐難挫其狂鋒爲此牌仰本官照牌事理

卽日整擄部下兵馬星馳前去該縣督同領兵將領等官多方設伏相機戰守機會可乘則率眾以拒敵事當少待則堅壁以待時務使逆賊不致狂圖地方得以甯謐軍中一切機宜悉聽便宜從事仍不時飛報以慰拳拳俱勿違誤未便

安置綦南合各降夷

爲慎收降以潰賊黨事照得收納降民業經監軍巡東二道會議散住綦江南川江津一帶鄉村就中安插撫恤諸議俱已詳盡但數日以來據報攜帶家口續投者接踵而至誠恐地狹人多蕪集一處宿食不便致啟釁端合再設

法安置使各得所爲此牌仰巡上東道官吏卽便行綦南合江江津等處責成掌印官將投降夷民除已安置得所外如有叢聚未便或目前以次來降者審無詐僞俱發江北地方散處中間裹有糞藥可以餬口者聽其自贍貧乏無所倚靠者卽行該州縣掌印官查明酌其人口多寡量給粥米於收貯稻穀內動支給養有司官柔遠有方降人得所者事完優薦若安插失所致有意外之虞者定行重處具安插過數目緣由報查

行兩省約期進兵

爲軍務事照得播賊楊應龍兇同梟獍很過豺狼拒敵王

師三省盡爲塗炭殺戮將領萬姓悉被虔劉惡極滔天罪已淪於不道孽盈彌地犯豈止於無將城野難堪人神共憤倣尤可懼王法不原本部院奉命總督職在專征且朝廷斷以征勦爲期則主將當以蕩平自誓卽今糧草處處霧集而兵馬在在雲屯加之文武同心中外僇力旣眾議已僉同應整師而問罪合就約會共伸大舉爲此牌仰該道卽便獎率文武將吏漢土官兵的於二月十二日各照分定道路同日齊進開刀勦殺至十八日各抵播州師期已定各宜奮勇攄忠布昭聖武犁庭掃穴謀慮務出於萬全震疊天威戡定期收於一戰永清三省之妖氛共洩四

海之憤恨用命衝鋒直前奏績者賞格具在斷不食言違
命逗遛畏縮罔功不依期進兵策應因而失誤軍機者賜
劔森嚴決不姑貸

分遣督陣員役

爲軍務事照得三省合兵八路攻播每路應用督陣官兵
各四員名官執紅旗兵捧令牌各一面隨營催督進剿庶
幾人有鬪志事功可集合就分定通行爲此票仰執旗官
某捧牌兵某一體遵照至期前去某路隨營督陣凡我漢
土官兵但遇與賊對壘卽捧旗牌奮力催督令直前衝鋒
破敵如有怯懦不前退縮不進者卽報監軍總鎮聽於令

旗下登時斬首以殉如各官徇情阿縱隱匿不報以致失
誤軍機者一體梟示不貸

檄責總兵陳璘

爲緊急軍務事照得播賊披猖致煩天討凡爲臣子孰不
欲投袂而起滅此朝食頃據湖廣總兵官詳稱職過武岡
州據守備宗孟開報奉下湖南道明文轉奉兩臺止募得
兵五十名送職閱驗送道簡選則楚兵之集否可見又稱
楚糧未見何處器械未見完備職所統廣兵三營糧食已
缺恐到彼復稱未備乞請咨兩廣召募興甯等兵卽不得
四萬亦得三萬等因到部除批行外爲照湖廣兵糧本部

院自昨歲六月以來檄催文移不啻千言差過人役往返無數今查官兵數目近於正月十六日辰常兵備道報稱已召募過漢土官兵一萬三千九百一十一員名鎮守哨兵一千名見在偏鎮防守又本部院徑調永順宣慰司兵一萬名保靖宣慰司兵一萬名烏羅長官司二千名并餘慶等司願報效備兵三千名是前後已有兵三萬九千有零其餘連鎮守麻陽溲浦等處加調者共約四萬之上矣其糧餉一項湖廣布政司報稱動銀羅買并播倉穀已有三萬餘石分守湖北道報稱節奉明文遵照動銀羅買并動倉穀十分之三播米共計七萬三千餘石陸續見運鎮

遠等倉收貯是糧餉已有十萬石之上矣又稱買完鹽二萬斤薑一萬斤魚一十二萬斤又發銀七百兩於沅州辰州等處收買糯米以作乾糧之用其軍火器具靖銅等衛堪用及修完者已運沅州聽令取用各等因在卷乃今本官未查確實屢次具文申稱兵糧何在豈其入境之初止聞人言使爾周章失措耶或先爲此文託之不備以爲將來委過之地耶夫應龍小豎子耳本官所當又只八路之一耳帶來廣東精兵已及二千之上本處土漢官兵不下四萬有餘撫院親臨各道畢集何所不備而必欲招廣兵若三省之中有遼將則招遼兵有閩將則招閩兵是以環

播三十萬之兵將坐食以待一二將領之招家兵也事當何時決賊當何時滅乎本官當今驍將海外皆知其名決不以應龍虛聲遂爾退怯當由未至沅州未見兵糧實數故爲老成持重之慮但事以輕爲而失亦以重發而誤卽今師期已發春水將生若再遷延便是夏日狂賊得勢平定無期思之寒心合行開諭爲此牌仰該鎮官吏卽便遵照將所部兵馬已到者設法分布未到者作速行催照依頒定師期責成信地進攻仍諭領兵偏裨將領及漢土官兵務俱齊心協力埽穴犁庭有功之日定照賞格施行如或仍前推委不行懈怠軍機者本部院惟知執法從事決

不寬假毋得遲違未便

發劍

爲軍務事照得本部院欽承主命總督三藩提七省之雄師征一方之反賊該兵部具題賜劍以重事權奉聖旨賜劍有不用命的許先斬後奏欽此除欽遵外爲照事屬三省兵分八路人心渙散法在便宜除將欽賜尙方寶劍留在轅門遵旨行事外所據六監軍六總兵各專生殺之權咸有便宜之令相應仰體聖意各發一劍以便行事爲此除將寶劍一口發總兵官收候外牌仰該道鎮即便會同總兵官監軍道一體遵照安置營中凡有臨敵避難不肯用

命應夾攻而不夾攻應應援而不應援者卽押至令旗下以賜劔行事施行毋得違錯

行各道并委官料理各司職事

爲軍務事照得軍旅之事非一才一力所能辦者故上藉監司以綜理之下賴百執事以分任之然後羣策羣力輻湊嚮應而膚功可立奏也播賊楊應龍逆天造反興師問罪進剿在邇頃將川中四路軍前應用監軍督餉紀功等道贊理監紀督運糧餉大小文武等官俱經案行司道轉行遵照去後今訪軍前實心奉行者事無不豫至若視爲末務不行幹理者尙爾懵然無知萬一推延誤事責將誰

諉所有原行分管職掌合再通行申飭俾知遵守庶便責成爲此

一行東南監軍一道劄仰該道官吏照劄事理即便遵照專理監軍職事凡軍中運籌決勝破固擣巢出正出奇用間用謀或計擒元兇或離散黨與或聲東擊西或將計就計與夫攻其無備出其不意諸如此者在該道與主將臨事相機應變而動非本部院所能遙制以至官軍賞罰將領功罪軍中一切大小情弊應徑行者徑行應揭報者揭報仍督同贊理監紀官同知史朝貞推官高折枝知府蔡宗憲同知趙世德計議而行俱毋違錯未便

一行巡上東巡下南道爲此劄仰該道官吏即便遵照專

巡下東敘馬瀘

理綦江南川合江永甯一路催僱兵馬紀驗功次兼分督糧運執事凡軍中合用木折糧餉轉運夫役俱要催督接濟必使運夫不致失誤軍餉得以疏通至於擒斬功級如遇官兵解到須發贊理監紀官辯驗真的除幼小婦女及無小功俱削去外其餘壯功分別應賞應紀填給按院印發功票一面行賞一面呈報施行毋得違錯未便

一行綦江南川合江永甯贊理監紀官重慶府推官高折枝敘州府同知史朝貞馬湖府知府蔡宗憲嘉定州州同趙世德劄仰本官即便專理綦江南川合江永甯路監紀

二事凡軍中運籌決勝進止機宜悉聽贊理擒斬功級老幼真偽悉聽辯驗應紀應賞一切奸弊悉聽裁酌摘發百凡機務仍呈監軍紀功二道計議而行務須計出萬全功收一戰本官邊才於斯見矣俱毋違錯未便

一行運收糧餉官重慶府同知王陞烏蒙府通判劉之瀾涪州州判馮泰運協理達州州同李潤放散爲此劄仰本官卽便督同榮縣主簿周有德犍爲縣典史張時逢青神縣典史李希賢汶川縣典史蔣一浙自南川起發處一路營中住劄本官專一監收監支幕職二官各聽往來驅使凡遇各府州縣轉運糧餉到營逐一驗視乾圓潔淨者卽

便照數隨營收貯聽候軍兵隨便本折兼支照冊放散不許短少仍多方遮蓋不得沓爛其有糠粃不堪及短少者責令颺簸潔淨截數收貯行令原解州縣照數運補至於一收一支俱用平斗毋容增減各官俱聽巡上東巡下東道提調其銀米或有不繼及各處轉運遲滯者卽呈該道催發接濟此處米或支盡或移營就便隨同官軍以漸而進至播州止此係三軍張口待哺重務如有託故避難捏病推諉致誤軍機者定行從重究處決不輕貸

一行督夫運餉官蓬州知州毛秉光巫山縣知縣陳應式爲此劄仰本官卽便督同播州長官司吏目徐里雲陽縣

典史徐嘉慶新甯縣典史熊子元松坎驛驛丞張二南自南川起發處一路營中住劄本官專一督夫運餉募職二官各聽往來協同稽查催儼凡遇各州縣轉運餉米到彼卽便約會遊擊任承爵帶領軍兵共同管押晝則沿途防護夜則加謹巡邏一程徑送一程計至營中交與運收糧餉官收貯明白循環往來隨同官兵以漸而進運完停止俱聽巡上東巡下東道提調如運夫或有逃逸不行送到官兵或有偷惰不行護運者據實揭申該道轉呈本部院以憑重處若各官間有託故避難捏病推諉致誤軍機者亦行重究不饒

一行運收糧餉官夔州府通判尹紹皋協理合州知州段文郁放散爲此劄仰本官卽便督同彭山縣主簿夏子賢梁山縣典史劉國文渠縣主簿陳迪梓潼縣典史李楚長壽縣知縣郭維屏散給自綦江起發處一路營中住劄本官專一監收監支照前云云

一行督夫運餉官大甯縣知縣何躍龍儀隴縣知縣袁煥爲此劄仰本官卽便督同鄰水縣主簿張大化仁水驛驛丞李兆慶營山縣典史喻廷龍烏江驛驛丞徐承智自綦江起發處一路營中住劄本官專一督夫運餉幕職二官各聽往來協同稽查催饋凡遇各州縣轉運餉米到彼卽

便約會都司程試帶領軍兵云前

一行運收糧餉官敘州府同知李廷謙新繁縣知縣魏光祚爲此劄仰本官即便會同大邑縣主簿王家士蒲江縣典史施雲鳳金堂縣典史劉承恩內江縣典史張希伯自合江起發處一路營中住劄本官專一云前

一督夫運餉官榮縣知縣樂繼同彭縣知縣鄭須德爲此劄仰本官即便督同仁壽縣主簿吳國藩彭縣典史羅富昌安縣典史倪墀德陽縣典史黃廷文自合江起發處一路營中住劄本官專一督夫運餉幕職二官各聽往來協同稽查催償凡遇各州縣轉運餉米到彼即便約會帶領

軍兵云前

一行運收糧餉官順慶府同知馬性和資陽縣原任知縣詹淑爲此劄仰本官卽便督同漢州吏目左鉅峨眉縣典史張東陽井研縣主簿吳時霖平羌驛驛丞黃鉞自永甯起發處一路營中住劄云前

一督夫運餉官資陽縣知縣葉世孝內江縣知縣楊應登劄仰本官卽便督同茂州判官梅子鳳岳池縣主簿朱朝輔夾江縣主簿熊伯仁西充縣典史林元晃自永甯起發處一路營中住劄本官專一督夫運餉募職二官各聽往來協同稽查催饋凡遇各州縣轉運餉米到彼卽便約會

參將王夢吉帶領軍兵云前

行拏楊惟中

爲軍務事案照先據管思石守備事都司楊惟中呈稱卑職循例出謁郭參政面議地方事宜行至地名煎茶溪正月初五日逆酋兵犯龍泉鄉去土官安民志除死傷官兵查實另報等因到本部院已經牌行該道將本官姑饒死罪聽立功保守思石地方去後今二十五日又據分巡思石及據該府復申楊惟中先期徑至鸚鵡溪將家眷移送潮底河下潛住以致誘苗入境等因該本部院會同貴州撫院郭爲照本官身爲將領定有地方乃賊未來輒挈家

而走擅離信地遂爲逆賊所乘土官安民志率兵交攻身
罹鋒刃所部軍民無官兵救援悉遭荼毒皆由本官坐視
以致大失軍機法應拏究爲此牌仰思石道官吏卽將楊
惟中嚴拏監候一面備查該司殺虜人數官兵的有若干
漢土居民共去若干龍泉司印見在何處及將本官失機
情由據實依律招叅以憑處治其龍泉地方一面責令叅
將陳良玳王一桂各多發勁兵戍守仍行思石二府速備
糧餉聽候進剿施行先具監候緣由報查毋違

禁殺降

爲軍務事照得石砭酉陽土兵近日得功原係攻破金筑

險塞官壩大營該本部院指授監紀道府機宜用以寒賊之膽庶使被害之人早得出降非漫爲也乃各領兵官不知緣故遂因此縱兵搜索截殺降人日報零級殘民命傷天理是豈弔民伐罪之意除查明另究外應合申飭爲此牌仰川南監軍道官吏轉行各營領兵將官禁論漢土大小官兵各宜靜守邊界聽候令到方許進剿有投降者查實引赴該道查明發內地安插卽以功論如再縱兵殺降不但論功審實仍以違令處斬決不輕貸毋得故違未便

再催三省道鎮至期進兵

爲軍務事照得三省合兵征剿播賊信地已分師期已定及令整擄兵馬屯積糧草束裝以待至期並舉去後第恐大小文武視爲泛常致誤大事合再嚴督爲此牌仰該道鎮官吏卽便會同

監軍道總兵官

將該路兵馬整點齊備糧草屯

積停當與夫軍火器具等項一一整齊至期督率大小三軍一齊並進所謂疾雷之下不及掩耳斬關而入在茲一舉若或至期卻稱兵馬未齊糧草未就遂巡不進逗遛不前致誤軍機者敕劔具在決不敢私各具遵行緣由報查爪探湖貴進兵日期

爲軍務事照得三省合兵剿播主將偏裨與監軍等官信

地已分師期已約業經通行至日並攻去後第恐各路大小官員視爲兒戲至期觀望不進有誤大事合就差人分投爪探爲此牌仰本官即便馳赴

貴州興龍養龍湖廣偏橋龍泉

一帶地

方密探某路某兵若干是何將官統領的於某月日開刀進攻某路某兵若干是何將官統領至期觀望不進逐查明白據實先行飛報旣不許受囑徇情又不許藉口差探乘機生事擾害官兵查出罪不輕貸

責成奢世續臨陣

爲軍務事照得永甯原報土兵係宣撫奢世續節申自願傾土出兵報效協同勦播本部院屢徑行牌整備聽令至

期進攻又經厚行犒賞以示鼓舞去後今照師期已定三省官兵是日一齊開刀進剿但恐兵不精利徒以老弱充數何以使強敵披靡又或本官不親行但使目把統領何以使部卒用命若待不能成功或致僨事然後行法究治卽於本官不便然於國家亦何利焉相應再行申飭爲此牌仰本官卽將部下土兵行令目把劉國用等嚴行挑選必人人精壯一可當十本官親自統率躬赴播境劄營聽主將號令至期開刀進攻直搗賊巢埽穴犁庭川收奇捷彼時論功行賞自有特異之典如或託諸部目不行親詣陣前有誤事機訪出重處賜劔具在定不輕恕

犒冉御龍

爲軍務事據酉陽宣撫司宣撫冉御龍并把總冉大周各
中解督率目兵克破官壩大寨共擒斬播賊三百零一名
顆到部據此行據監軍道驗明除將部下有功目兵當卽
照功行賞外看得宣撫冉御龍壯懷激烈紀律嚴明志滅
窮兇則奮勇先登大破險寨於二日恩聯勁卒則僂力轉
戰首建奇捷以多功賊膽因之頓寒忠勤自茲表見把總
冉大周心存報効力在攄忠擒斬亦多功可嘉尙俱應獎
犒以鼓敵愾爲此牌仰本官卽將解發銀花二枝共重二
兩銀牌二面共重二十兩銀盃二箇共重八兩色段二匹

送給本官又重一兩銀花二枝色段一匹白銀八兩賞冉大周各收領以示軍門優犒之意本官與冉大周承獎之後務要獎率三軍竭忠報國埽穴犁庭成功之日自有厚酬慎勿始勤終怠可也

行道鎮破酋狡計

爲軍務事據貴州左監軍道報稱緝獲楊酋老虎兵劉奇才劉恩供稱應龍聞知各省大兵分作十二哨進播應龍與心腹莊局家丁內親管估刻共一萬七千人同上海龍國拒守本國實在倉米大小三四千間其未上刻外親管苗兵并里民兵於養馬城養雞城李三窩等處硬劄營寨

應龍號兵二萬於干溪頭鋪劄一大營拒川路楊朝棟號
兵二萬於桃溪墳壩頭劄一大營拒水西井烏江兵田氏
號兵一萬於毛坪劄一營防永甯截龍囤後路令太監劉
元提調顏和羅留元尙意等集六統制所轄漢夷民赴板
山囤敵水西羅兵令總管何漢良統集湄潭夷漢拒馬腦
等囤敵思南龍泉偏橋兵令僞安撫楊珠并楊留陳天恩
楊三等統集西平瓮水司地黑壩夷漢土兵敵河渡江界
牛場平越兵令夷頭羅剛等領安羅三寨苗兵拒合江永
甯之兵另以兵十名立爲一隊內三名用長槍三名用弩
三名用刷刀一名用斬馬刀或撈鉤另總用兵一百名披

虎皮常川教演驚嚇馬軍等情轉報到本部院爲照該賊
久知我兵四集亦知滅期不遠分兵拒險拒我進攻觀其
收人心腹莊下上固固守又教各兵假辦虎形驚嚇馬軍
一則儘力死拒一則退固以守此狡賊勢所必有者惟目
前破敵之方制勝之策亟應預謀爲此牌仰該道鎮官吏
卽將播賊分營屯兵拒我攻剿與教兵披挂虎皮等計并
賊所用長槍刀弩等器逐一多方籌算查照近發進兵須
知事宜參酌熟講彼用何項狡計我以何策破敵務須密
諭三軍俾人人悉知其計以鼓臨敵膽氣仍通行各將領
知會毋違

行湖貴道鎮分定官兵信地

爲軍務事照得三省合兵八路攻播蜀任其四黔任其三楚任其一除川省四路業已分布外所有湖貴二省文武官員前雖有行尙多缺略茲者官兵在在大備應再酌定申明庶便責成如貴州一路從烏江進則貴陽兵三萬餘總兵童元鎮參將謝崇爵守備陳雲龍沐燦中軍張澍劉岳土知府隴澄知州岑紹勳等主之一路從沙溪進則水西兵三萬餘參將朱鶴齡宣慰安疆臣千戶王安民等主之此皆貴州左監軍楊寅秋督也一路從黃平進則合興隆黃平平越兵三萬餘總兵李應祥副總兵陳寅參將楊

顯劉效節守備汪如淵宣慰彭元錦等主之此貴州右監
軍張存意督也一路從龍泉進則偏橋兵三萬施南兵八
千總兵陳璘副總兵陳良珙參將王一桂都司錢中選守
備王之棟徐允爵宣慰彭養政宣撫覃宜覃玉鑑安撫覃
大豐等主之此湖廣監軍魏養蒙督也其宣慰彭元錦查
先該本部院調兵一萬由偏橋進今據貴州撫院咨稱調
該司兵五千駐興隆如該司兵五千已駐興隆則尙有五
千應進偏橋本官宜自領一路五千責成忠勇目把督領
一路五千以上三總兵合四川三總兵陳璘在偏橋李應
祥在平越童元鎮在貴陽劉縱在綦江吳廣在永甯馬孔

英提騎兵往來接應勇將強兵星羅綦布真有虎豹在山之勢加之副總參遊宣慰宣撫等官左右聯絡犄角儼有首尾率然之形區區小醜不足平矣目今師期已在眉睫毋容頃刻少緩者所有酌定信地合再通行遵守爲此牌仰該道鎮官吏即便會同監軍道總兵官轉行部下分定副總參遊都司守備宣慰宣撫知府知州安撫長官等官各一體遵照分定信地點兵馬整搦器械運籌決策束裝以待至期黎明一齊開刀入關剿殺施行師期已定道路已分如或畏怯不前違期不進致誤軍機者賜劔具在決不輕貸如龍泉賊勢未退總兵陳璘卽發驍將一員帶領

勁兵一枝星馳前來合思石等兵一齊直搗一面先行勦
逐一面隨後進兵無容滋蔓各具遵行緣由飛報查考

行湖貴二省照川中懸賞

爲軍務事照得征播懸賞條例業已奉有欽依通行三省
一體遵照去後今照官兵屯營播境卽目埽穴犁庭然非
重賞無以鼓三軍之勇除川省各路已經解發官帑付監
紀等官隨營懸示克敵犒賞外所有該省應合一例舉行
爲此牌仰監軍道官吏卽於軍餉銀內動支每路發一千
兩或二千兩秤封停當差官解去軍前交與管餉官收貯
遇有險寨險岡及大枝勁賊官兵如肯用命者酌量懸示

不拘三五兩約以當先用命著有成效者即便給賞則人心見利必趨而逆賊可以不戰自屈矣具支解過緣由呈報查考毋得遲違未便

令催安奢二土司進兵

爲軍務事照得播賊造反奉命弔伐三省合兵同日進剿

已經酌定師期

檄

移咨貴州撫院并

行

監軍總兵轉行領兵

流土等官一體遵照至日舉事及慮該司兵不精利強敵無能披靡官不親行部卒不肯用命屢行申飭嚴加挑選督至播境聽令去後今照師期屆臨正耀武揚威之日奪關斬寇之時合行督進爲此除差官齎捧令旗前來外牌

三才三言三

三

仰土官奢世續宣慰安疆臣即便督令目把劉國用等將部下土兵三

萬名親自統率照依分定信地於二月十二日開刀勦殺

十八日直抵播州及照此役總兵官六偏裨無限宣慰司

三宣撫司五而土知府知州招討安撫長官則又無限也

各擁雄兵死士之眾均懷摠忠吞賊之謀已非一朝一夕

矣若該司存狐疑觀望之心蓄鵠蚌相持之計恐為他人

所乘如近日惡目趙士登者李佩謀之不早而為曾文學

以計取之目今佩惟垂首喪氣已耳本部院指授立功在

此在彼何足為異第恐如李佩一失既於本官付託不效

即於國家尺寸無補將何報稱以答主命宜早決之毋自

誤矣慎之慎之

行高推官專督土兵

爲軍務事照得播賊猖亂奉天征討進兵逼近撲滅可期但惟南川一路漢土錯雜南北相攙人情旣多桀驁將官更鮮駕馭若不專官約束何以驅用命而肅軍紀也爲照推官高折枝恩信素孚土人推服况當見在監紀相應就近行委爲此除差官齎捧令旗前來外牌仰本官卽將酉陽石砦二司土兵二枝聽其提調時加鼓舞以增敵愾凡軍中一切進止機宜仍約會總兵將領計議而行若有難破之寨難登之險或大枝勁敵勢難仰攻者則懸重賞或

三五百兩功成之日卽移管餉官照格行賞俱聽便宜行
事至有不用命及離次亂紀者緩則綁赴監軍道以尙方
從事急則本官會同將領士兵徑於令旗下施行本官務
要大展謀猷早奏成績庶幾不負任使其將領等官如有
驕拗或畏縮不前者據實揭報以憑重處施行

平播全書卷九終